



lesen, daz so wie wir zu lesten verkouft hatten geyslichen und bierven herren dem abte und dem convent van unser vrauwen munster zu Luccemburg erflich und ymmerme unser schure genanten *Schrukenschure* mit allem hirne zubehoere, dy unser eygen guyt waz, als brieve daruber gemaicht hielden, dy wir noch hinter uns hatten, besigilt mit unser zweiger siegel, Johans siegel, unsers alsten bruders und mit eyns eirsams edelin mans siegel herrn Diederichs siegel, herren zu Honcheringen, ritters und richters der edeler luden dez hirtzdombs van Luccemburg zu der zyt, und solden denselven brief vort besiegelen doen mit der probstyen siegel vain Luccemburg, als der brief innehielde; ee aver das geschege, so verluren wir denselven brief mit versumenisse, sonder archlist, upsatze oder keynreleige boesheit, dat wir begriefen mit unsen eyden und mit unsern liefflichen truwen in eydis statt gegeben. Vortme denselven herren genuech zu doen, als wir geloeft hatten und schuldich woren, *so deden wir hin eynen anderen brief schrieven in demselben sinne und in derselber daten*, als der ierst waz, und gaven hin denen besiegelt mit unsern, unsers bruders vorg. und unsers herrn dez ritterrichters und der probstyen van Luccemburg vorg. siegeln besiegelt, als wir sculdich waren zu doen. Nu up daz, daz denselven herrn hernoe-malz in keyner zyt van demselven brieve, aif er vonden wurde und uns wieder wourde oder in ander hant queme, keynereleige krutte, zorn, lieden oder schade geschie oder komen muege, soe erkennen wir oeffenlich in diesen brieve, daz, so wo er vonden wourde, daz er vain keyner maicht noch valur sal sien; und unser keyn noch anders nyeman, wem er wourde, sal sich mit dem behelfen mugen, uns oder hime zu vrommen und denselven herrn zu schaiden. Ouch insollen wir noch inmugen nymer wiederkouf geprueven noch bewiesen, it ensie dan mit hirne heuft-brieve ons wiedergegeben, durch welchen dieser brief transfigert sie und durchgestochen. Und uf daz daz die vorg. herrn aller vorg. sachen sicher sien, so hain wir Matthis und Johan von Prysch vorg. unser ingesiegel aen diesen brief gehangen, und han vortme gebeden Johan, unsern altsten broeder von Prysch vorg., daz er ouch diesen brief besiegelen wille mit seime ingesigel, alle vorg. sachen stede zu halten mit uns. Und ich Johan von Prysch vorg. geloven alle vorg. sachen und gelovedin veste und stede zu halten mit meinen brudern vorg., und hain dez zu urkunde der woret minen siegel aen diesen brief gehangen by myner zweyger bruder siegel. Der geven wart, du man zalt na Goitz geburde druytzien hondert und syventzich jar, des anderin dages na sente Mattheus dage.